

示治法中初釋急挫抑入無動處。即下不動三昧治上輕動障。次釋無放逸攝入調伏聚者即下調柔三昧對上不調障。挫則臥反。摧也抑遏也。

△<sub>辰三</sub>失諸功德障。

失諸功德障者如經縱此心者喪人善事故。

三中喪善事者即失禪定智慧三乘因果功德。

△<sub>卯二</sub>三種三昧。

無二念三昧相者如經制之一處故起多功德三昧相者如經無事不辦故調柔不動三昧相者如經當勤精進折伏汝心故。

次三種三昧配上可見後三昧中折伏二字折對調柔伏對不動然前列三種三昧次第相由此對經文故少不次。

△<sub>庚二</sub>多食苦<sub>辛一</sub>標章<sub>辛二</sub>舉經<sub>辛三</sub>釋義。

今初

已說根欲苦對治次說多食苦對治。

△<sub>辛三</sub>舉經。

經曰汝等比丘受諸飲食當如服藥於好於惡勿生增減趣得支身以除饑渴如蜂採華但取其味不損色香比丘亦爾受人供養趣自除惱無得多求壞其善心譬如智者籌量牛力所堪多少不令過分以竭其力。

△<sup>辛三</sup>釋義二<sup>壬一</sup>示障法<sup>壬二</sup>明對治。 今初

論曰多食者三昧障故食有二種何等為二一者身食二者心心數法食。

二多食苦示障中身食者謂一切有形之食能資身力故能資所資俱是色法心心數法食者心即心王數即意思等即前四種心供養也以心數法食能資心王故能資所資皆是心法。

△<sup>壬三</sup>明對治二<sup>癸一</sup>明二種三昧<sup>癸二</sup>示六種功德。 今初

若多段食難止息故去禪定遠故是心心數法食者欲界相違法中方便對治故復有第一義心三昧中盡故成就無食三昧故。

次對治中初科為二初明身食言段食者亦名搏食謂有形段可搏墮故難止息者身既不調心則昏亂禪定難成故云去遠也此下合云成就少食三昧故傳文訛脫義必具之。

對下可見。是下次明心食。心數是欲界亂業。三昧是定業。故曰相違。即下用平等觀對治也。第一義心即下平等法身。體性寂滅。出過諸法。名第一義。得此三昧。心心數盡。故云無食。

△<sub>癸二</sub>示六種功德三<sub>子二</sub>通列<sub>子二</sub>別配<sub>子三</sub>牒釋。

今初

如是二種三昧。有六種功德成就。何等為六。一者受用對治功德成就。二者平等觀功德成就。三者究竟對治功德成就。四者顯示平等觀功德相似成就。五者不虛受功德成就。六者知時功德成就。

次科通列可解。

△<sub>子二</sub>別配。

此六種功德顯示成就二種三昧。第一第五第六功德成就顯示少食三昧故。餘者三種功德成就顯示無食三昧故。

次別配中。身心二食。一一各具三種功德。每一三中。各成一種三昧。則有二也。

△<sub>子三</sub>牒釋六。文如

受用對治功德成就者。如經汝等比丘受諸飲食當如服藥故。平等觀功德成就者。如經於好於惡勿生增減故。究竟對治功德成就者。如經趣得支身以除饑渴故。此示平等法身攝平等觀究竟無饑渴故。顯示平等觀功德相似成就者。如經如蜂採華但取其味不損色香比丘亦爾故。是中不損者。示現非壞法觀故。不虛受功德成就者。如經受人供養趣自除惱故。知時功德成就者。如經無得多求壞其善心故。多求者。示現心心數法多三昧功德不現前故。籌量牛力等。示知時相似法故。示現知時有二種。一者方便時計校故。二者成就時相應故。示多食過故。

牒釋初受用中律中具有四藥。食味為時藥。諸漿為非時藥。酥蜜等為七日藥。草木金石不任為食者為盡形藥。前之三藥通歸飲食。謂受上三藥當如有病服盡形耳。然盡形中亦有甘肥美味。今取苦澀辛辣不已而服。此心相應即為受用對治功德也。舊記至此廣辨四藥不知宗故

二平等觀者。以食有美惡心容增減。增謂食嗜減即嫌惡。誠令等觀即堪受施。若準律鈔。食有三種。於上食起貪是地獄因。下食起瞋是餓鬼因。中食起癡是畜生因。翻此三毒成三善根。今云增減未必起毒。但是於好惡境生分別念即非平等也。三究竟對治者。前明

對境起觀。此明觀成理顯。故云究竟。此示平等法身。攝平等觀者。謂色身有饑渴。故令趣爾。以食支持。反顯法身本無饑渴。既無饑渴。則知平等。由體平等。是以前令修平等觀。因理立觀。由觀趣理。故云攝也。四顯示相似中。蜂喻比丘。採華喻受食。但取味者。喻上支身。不損色香。喻心無增減。故下釋云。非壞法觀是也。求·壞俗士信。與此不同。不壞色香云·喻不多已上三種。

第二明正觀。三示觀成。四舉喻顯。此明由平等觀。而成無食三昧也。五不虛受中。取除惱者。惱謂飢渴。為療形苦。以成道業。故非虛矣。如明了論。受用飲食。當離四過。一喜樂過。貪味求安。二食醉過。身心力強。三求顏色過。樂於光悅。四莊嚴身過。樂得肥充。六知時中。初法說。心心數法多者。謂多求也。三昧不現前者。謂壞善心也。次喻顯中。智者用牛。不令過分行者。受食不可求多。用牛過分。則損力。受食多求。損三昧。舊記·檀越·以牛力喻·非也。示現下。釋知時相。

作意對治。為方便時。故云計校。三昧現前。為成就時。故云相應也。增一阿含佛說偈云。多食致病苦。少食氣力衰。處中而食者。如秤無高下。此之三種。第一示離過。五顯所為。六明節量。此明由對治法。而成少食三昧也。

△  
庚三 懈怠睡眠苦三  
辛一 標章  
辛二 舉經  
辛三 釋義。

今初